

COLUMNA

Il sbagli e la Urschel

DAVID TRUTTMANN/FMR

Quai è stà mes sbagli. Mea culpa. Bun, i n'è betg gist ina «maxima culpa» che jau m'avess adossà, cun forsà avair permalà u vulnerà insatgi. Igl è simplamain stà in sbagli, nua che jau sun stà mez il tami – u il «trut». Surtut sent jau ussa, durant scriver questa columna, las consequenzas da mes sbagli. I mudregia. Jau sun numnamain sfurzà da scriver questa columna. – Però tge è capità? Ora cun la puma!

Questa rubrica da columnas datti dapi decennis. Da preschent vegn ella scritta da passa 60 auturas ed auturs libers or da l'entir cosmos rumantsch. Ina squadra fidaivla che scriva texts cun plima fina ubain cun il martè grond. Texts engaschads, vivs, raffinads, spiertus, pensivs, divertents ed or dal mintgadi. Nus da la redacziun da la FMR avain en mintga cas grond gust da leger (sco emprims!) quels texts e da'ls pudair impagnar. U meglier ditg: nus avessan grond gust!

Perquai che a partir da schaner 2022 èn arrivadas en redacziun adina pli paucas columnas! Plaun a plaun ha la funtauna columnistica stalivà. Tge pomai è capità? Ha quai da far cun corona – cun la vita che sa normalisescha pass a pass? U èsi memia bell'aura per scriver?

Igl è da savair il suandant: Adina enturn la fin da l'onn scriv jau – sco schefredactur da la FMR – ina brev a tuttas columnistas e columnists. Quella brev cuntogna infurmaziuns davart la FMR, davart las



columnas, davart ils onuraris, las lunghezzas dals texts etc. Igl è damai ina brev per engraziar e per dar in sguard enavant en il proxim onn. La brev cuntogna numnamain era – e quai è prest il pli impurtant – in plan. Il plan da columnas. Sin quel èn numnads nums e terminis, tgi che ha da scriver sin cura.

Cura che la funtauna columnistica ha entschet a stalivar las davosas emnas hai jau sa chapescha consultà be direct quel plan. Tgi ha emblidà da scriver? Ma a mai parevi lura schon dubius che auturs uschiglio fitg punctuals e fidads n'avevan betg tramess lur texts. Ed i na deva er betg – sco uschiglio magari – da quels che s'annunziavan per dir ch'il text arrivia lura schon insacura, cun 100% garanzia, simplamain cun duas u trais emnas retard. Ma gnanc quai! In profund silenzi en las vastadads rumantschas.

Quest venderdi passà era il chanaster da columnas però talmain vid che jau hai stuì far retschertgas minuziusas. E lura è vengnid'ora la baschatta! Mes e-mail cun infurmaziuns e cun il plan da columnas, scrit ils 23 da december 2021, aveva jau bain tramess, però mo ad ina

pitschna grupp da columnistas e columnists. Ils blers aveva jau simplamain «emblidà» d'aggiuntar en il scumpartider da mail. La gronda part dals auturs n'ha damai udì nagut da mai... In detg malheur! Perquai hai jau ussa da scriver mez questa columna! Forsa che suenter arrivian lura pass a pass puspè novs texts. Sa chapescha hai jau immediat scrit a tut las 60 auturas ed auturs e declerà mes sbagli.

Insumma, fatg è fatg. I na sa lascha betg pli midar. Ma i mudregia e secca tuttina! E quel sentiment na ma lascha betg en ruaus. Però quel sentiment da pudair urlar sco il chaun Barry vers la stgira notg, quel sentiment enconuscha segir mintgin/a. Perquai ch'i dat gea avunda locuziuns e proverbis ch'emprovan da consolar en talas situaziuns. P.ex. datti quel da Robinson Crusoe: «Fallond s'emprenda.» U quel emprestà dal tudestg: «Fallar è uman.» U l'anglais: «Shit happens.» Ma il pli bain ma plascha in proverbis tirolais che jau hai gia udì savens a Müstair: «Hinten nach reitet die (krumm) Urschel!» – Il proverbis vegn cun il curius maletg dad ina Urschel che chavaltgescha a la fin. Tge pomai vul quai dir? – La decleraziun: Guardond enavos èn ins adina pli furber ed i na fa betg grond senn da far chalenders.

Grazia, chara Urschel, i ma para bunamain, sco sche quest proverbis gidass. Mes sbagli mudregia gia in zichel damain. E dal rest: la columna è scritta!

David Truttmann è schefredactur da la FMR Fundaziun Medias Rumantschas e tgira la rubrica da las columnas che cumparan tranter auter en La Quotidiana e per part en la Pagina da Surmeir.